



partii naleraq

Nuuk 18. oktober 2018
UKA2018/82
Hans Enoksen Partii Naleraq

Maannakkut ineqarnermut tapit pillugit malittarisassani isertitat tunngaviusarneri pinngitsoorani ilumut inunnt aningaasatigut pisariaqartitsinerpaaginnarnut atuunnersut pillugit allaaserinninnertalimmik misissuinnertalimmillu UKA2019-mi nassuiaammik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Aamma ilanngunneqassaaq init ataasiakkaat ingerlanneqarnerannut aningaasartuutit piviusut aaqqissuussinerup qularnaartarnerai. Nassuiaammi aamma ilanngunneqassapput tigussaasut siunnersuutit innersuussinerillu Akileraartarnermut Atugarissaarnermullu Ataatsimiititaliap allaaserisai ineqarnermut tapiisarnermut tunngatillugu ataqatigiissaariniarnikkut ajornartorsiutaasartut ataatsimoortumik aaqqiiviginiarlugit.

(Inatsisartuni ilaasortaq, Tillie Martinussen, Suleqatigiissitsisut)

Inatsisartunut ilasortaq Tillie Martinussen Suleqatigiissitsisut saqqummissaqarpoq ulluinnarni soqutiginarumik atukkatsinnut sunniuteqarluinnartumik tamannalu partii naleqqamiit oqaseqarfigissavarput.

Ineqarnermut akiliutaasartut nunatsinni inuuniarnikkut atukkatta qanoq pitsaatiginissaanut qanoq sunniuteqartartigisut tamatta ilisimalluarparput, tassami ineqarnermut akit ima qaffasitsigaat., inuit isertitakitsut aningaasarsigunik amerlanerpaat ineqarnerminnut akiliutigisarmatigit, naak aamma qaavatigut ineqarnerminnut tapiiffigitartaluarlutik. Ineqarnermut akit qaffasereeqqisut taakkua akileriarlugit, taava sulii qaavatigut kiassarnermut qaammaqqutinullu akiliisarput tassalu inuuniutissaat tassani aamma ilangarujussuarneqartarlutik.

Innuttaasut isertitakitsut sulisartut, utoqqaat siusinaartumik sulisinnaajunnaarnersiutillit, kiisalu innarluutillit inuuniarnermikkut assut ilungersunartumik inissittarput, pingaartumik arlariinnik meerartaqarsimagunik inuuniarnikkut oqitsuinnaanngitsumik atugaqarlutik inissittariaqartarlutik.

Taakkuinnaanngillat aamma ataataat anaanallu kisimiittut, meeqqanik arlariinnik pilersugallit, assut ilungersunartumik atugaqarlutik inuuniarnermik ingerlataarat malunnarluarmat pingaartumik aamma meeqqartaminnut aamma atisassaqartitsiniarnerat inuussutissaqartitsiniarnerallu eqqarsaatigalugit.

Aammalu ilaqarpugut akunnattunik isertitalinnik taakkualu sutigut tamatigut tapiiffigineqassanatik inuuniarnikkut artornartorsiornertik ingerlappaat, assersuutigalugu meeqqerivinnut tamakkiisumik akiliisarlugit, ineqarnermut tapiiffigineqassanatik, meeraat tapisiaqanngitsut, taamaattumik akunnatunik isertitalliit atugaat aamma ilanngullugit misissuiffigineqartariaqalerput inuuniarnikkummi aamma ingerlaniapiloorput.

Ungasinngitsukkut inersuarimi maani meeqqat tapisiaat eqqartoratsigit Partiit naalakkersuisoqatigiit ilaannik oqariartuutigineqarpoq meeqqat tapisianik qaffassagutta taava aningaasat sumingaansanersut apeqqusersorlugit. Taavami pinaartitagut meeqqat taamak nalilersulersimassagutsigit pitsaanngorsaaffiginissaat akissaqarfiginagu, taava aningaasalersuinermi tulleriaarinerit naapertuppaallaangitsumik ingerlanneqalersimasut takusinnaavarput.

Taamaattumik inuuniarnikkut atukkagut pingaartumik isertitakinnerusut eqqarsaatigalugit taava suna misissorniarnerrippat aperisaqariarpugut, tassami pissakinnerusunik taaneqartartut atugaat qanoq ilungersunartigisut ilisimavagut, tassami nalunngilarput ukiorpassuit ingerlavugut pissutsit allannorpallaarneq ajortut ilisimagatsigit taava pisarnertut aamma qaavatigut misissoqqillugit.

Aammalu utoqqaat kingullermik neriorsorneqarnikkuupput utoqqalernersiutit aaqqinneqassasut, tamannalu aatsaat piffissami kingullermi nalunaarutigineqarpoq aatsaat 2020 aaqqinniarneqassasut, soorunami tamanna aamma utoqqarnut pakatsinassasoq takoorloorsinnaavarput.

Naalakkersuisut akissutaanni takusinnaavarput oqaasertaliussami assut akuersaaruminaatsumik akissutigineqartut ilaat. Taamaammat ineqarnermut tapiissutit innuttaasunut aningaasaqarnikkut pisariaqartitsinerpaanut saamititaanersut paasiniaaffigissallugu pisariaqartinneqanngitsaq Naalakkersuisut isumaqarput”

Akissut ullumikkut inuuniarnikkut inuppassuarnik atugarineqartut eqqarsaatigalugit assut akuersaaruminaappoq. Tassami ilisimalluarparput ilaqutariippasuit meerartallit ukiuni kingullerni inigisaminnik anisinneqartartut amerlasorujussuummata taamaattumik soqutigittaappasittumik taamak akissumminni oqaasertaliinerat ajuusaarnarluinnarpoq.

Taamak oqaaseqarluta Tillie Martinussen-ip aalajangiiffigisassatut siunnersutaa tamakkiisumik taperserlugu oqaatigissavarput tassalu allaaserinnillu misissuinerlammik Naalakkersuisut ingerlatsissasut.

Naggataatigut innersuussutigissavarput isumaginninnermi ataatsimiititaliami suliarineqarnissaa.